

## Un linzolu di lèggi

Curcateddu ‘ncapu lu lettu  
arriposu l’anima e la menti.  
Cu la testa ‘ncapu  
lu cuscinu chinu di sapiri,  
cercu lu megliu scupriri.

Cummigliatu finu ‘ntesta  
cu lu linzolu chinu di disii,  
mi veni di scriviri tanti poesii.

‘Stu linzolu  
beddu biancu prima,  
ora, è chinu di versi  
e di pinzera persi.

Versi veri e versi farsi,  
di tutti ‘sti poesii scritti,  
cc’è fantasia e tanta virità,  
senza tecchia di malignità.

Lu stinnivu fora pi fallu arrifricari  
pi lu ventu purtàrisi li brutti pinzera  
e lassari chiddi boni ca ognunu spera.

Iu scrivu versi,  
ma nun ci vidu versu,  
‘stu munnu è troppu malandatu,  
mi cummogliu pi nun èssiri ‘nfittatu.

Sutta lu linzolu  
si vidi un munnu diversu  
cu tecchia di fantasia  
la vita passa comu ‘na poesia.

Cummigliàtivi puru vatri,  
mittitivi lu linzolu finu ‘ntesta,  
chiuditi l’occhi, tuttu sarà ‘na festa.

2013 Giuseppe Cardella